



Bulletin Mensál Governasaun Lokál

Volume I, Edisaun XI
Novembru 2008

Governo Lokál Xave ba Dezenvolvimentu

Governu Halo Konsultasaun ba Ezbosu Lei 3 kona-ba Governasaun Lokál

Governu hakarak involve ema hotu atu kontribui sira nia hanoin ba lei hodi reforma Governu Lokál, liu husi dalan hala'o konsultasaun. Director Nacional de Dezenvolvimento Local e Ordenamento do Territorio (DNDLOT) Sr. Miguel P. de Carvalho hamutuk ho ekipa tékniku husi Ministériu de Administrasaun Estatal e Ordenamento do Territorio sei hale'u distritu hotu hodi halo konsultasaun kona-ba Ezbosu Lei Governu Lokál, Lei Divizaun Administrativu Territorial no ezbosu Lei Eleisaun Munisípiu hodi rekolha hanoin husi autoridade lokál, lider kumunitáriu, sociedade sivil no mós ba comunidade iha nivel lokál kona-ba proposta lei ne'ebé refere.



Director DNDLOT Miguel Pereira hala'o diskusaun kona-ba proposta lei iha Distritu Manatuto iha loron 11 Novembru

Señor direktór DNDLOT esprika kona-ba importánsia husi konsultasaun ne'e. "Konsultasaun ida ne'e Governu maka halo ho hanoin atu involve ema hotu iha prosesu ida ne'e hodi akumulá hanoin, sujestaun, komentáriu ka preokupasaun husi ema hotu, atu nune'e bele hadi'a liu tan ezbosu lei tolu ne'e antes Parlamentu Nasionál aprova," Sr. Direktór hato'o durante nia diskursu iha Manatuto iha loron 11 Novembru 2008.

Durante konsultasaun iha Liquica iha loron 14 Novembru, Domingos dos Santos, Juventude ida fó nia hanoin kona-ba importánsia husi konsultasaun ne'e. "Iha prosesu konsultasaun ne'e importante tebes atu ema hotu bele fó sira nia hanoin,

saida maka di'ak liu atu inklui iha lei ne'e, tanba iha futuru lei tolu ne'e maka sei regula lala'ok husi munisípiu, ita lakohi to'o ikus mai lei ne'e aprova tiha maka ita foin ko'alia katak lei ne'e la los, maibé ida los ne'e labele hatama tanba ne'e tarde ona, ita hakarak atu lei ne'e bele garantia munisípiu aban bain rua bele funsiona ho di'ak atu nune'e dezenvolvimentu bele la'o di'ak duke agora," Sr. Domingos hateten lia hirak ne'e hafoin konsultasaun, nia mós husu atu governu bele involve ema intelektuál sira hodi kontribui sira nia hanoin kona-ba lei ne'ebé refere.

"Ami haksolok tebes ho ezbosu lei tolu ne'e, maski sei iha buat balun ke seidak akumulá hotu maibé ida ne'e di'ak atu ita bele hahú hakat ona ba dalan desentralizasaun, buat ne'ebé sei falta ita sei hadi'a importante liu maka ita tenki hahú hodi estabelese munisípiu bazeia ba ezbosu lei tolu ne'e, kuandu ita hala'o ona maka ita sei haree fali, sei la nune'e ita nunca bele hakat ba oin," haktuir Sr. Rui Gomes, Administradór Sub-Distritu Natarbora, hafoin konsultasaun.

Durante prosesu konsultasaun preokupasaun ne'ebé partisipante sira foti maka hanesan prosesu ba eleisaun, fundus ba suku nian, relasaun suku ho munisípiu no fronteira suku.

Lei 3 ne'e maka sai hanesan kuadru legál ba desentralizasaun ne'ebé sei muda serbisu governu nian besik liu ba povu no haforsa comunidade lokál ho rekursu hodi responde ba nesidade dezenvolvimentu iha nivel lokál.



Konsultasaun ne'ebé hala'o iha Distritu Liquiça iha loron 14 Novembru 2008. Iha konsultasaun ida ne'e, partisipantes fahe ba grupus hodi debate kona-ba ezbosu lei tolu prepara husi Ministerio. Idea no hanoin ne'ebé sira hato'o sei tama hotu iha Governo nia konsiderasan kona-ba oinsá atu estabelese govverno lokál aban-bainrua.



Desentralizasaun

Informasaun
Badak

Fulan
Dezembriu

- Rekolha
Relatoriu
husi
Distritu
- *Boa Ferias!*

Vizita Komparativu Lori Membru Assembleia sira Troka Hanoin no Hametin Amizade

Membru Assembleia Distritu Pilotu Programa Dezenvolvimentu Lokál (PDL) husi distritu 8 hahu husi loron 19 to'o 20 Novembru, hala'o atividade vizita komparativu, membru husi distritu 6 halo vijan ba distritu rua seluk Bobonaro no Lautem. Distritu Bobonaro sai uma na'in ba Distritu Baucau, Covalima no Manatuto, Distritu Lautem sai uma na'in ba distritu Aileu, Ainaro no Manufahi.

“Objetivu husi vizita komparativu ne'e maka atu fó oportunidade ba membru assembleia sira hodi troka sira nia esperensia kona-ba PDL, hodi hetan idea foun no buka hatene obstaklu ne'ebé distritu sira hasoru no oinsá sira rezolve atu nune'e membru assembleia sira bele halo komparasaun tuir sira nia esperensia ho PDL,” haktuir Sr. Gaspar Henrique da Silva, Chefe Departamentu Ordenamento do Territorio iha Ministerio da Administração Estatal e Ordenamento do Territorio, ne'ebé sai hanesan kordenadór ba atividade vizita komparativu iha distritu Lautem iha ninia diskursu.

Durante loron tolu iha Distritu Lautem, membru assembleia sira halo vizita ba suku no sub-distritu sira ne'ebé hala'o projetu PDL hodi haree ba qualidade husi projetu infraestrutura sira ne'e no buka hatene sentimentu comunidade nudár beneficiáriu ba projetu ne'ebé halo iha sira nia suku no prosesu oinsá comunidade hato'o sira nia proposta hodi hetan projetu sira ne'e.



Membru Assembleia ba haree projetu ne'ebé halo husi PDL

“Buat ne'ebé ami hetan husi distritu Lautem maka ami haree katak iha kolaborasaun servisu ne'ebé di'ak tebes husi setór sira ba iha PDL,” haktuir Sr. Jose A.C. Braz, Ofisiál Dezenvolvimentu Distritu Manufahi.

“Ami sente orgulhu tebes ho vizita komparativu ne'e, iha ne'e ami bele aprende buat foun balun, ami bele troka ami nia idea, ami bele halo komparasaun kona-ba difikuldade ne'ebé ami hasoru. Husi ne'e ami bele komprende liu tan oinsá hasoru obstaklu no foti desizaun ba problema ne'ebé ami hasoru iha PDL. Alein de ne'e vizita komparativu ne'e mós hametin liu tan amizade no unidade entre distritu hodi halakon isu Loro sa'e no Loro monu,” haktuir Sra. Joana Maria Babo, Membru Assembleia distritu Aileu durante kalan despedida iha Lospalos. Sra. Joana husu atu programa hanesan bele kontinua hala'o iha tempu oin ba fali distritu seluk. Sira mós prontu hodi simu Distritu Lautem no distritu sira seluk karik atu ba halo vizita ba sira nia distritu Aileu.

Membru assembleia sira uza oportunidade husi Vizita Komparativu ne'e hodi habelar informasaun kona-ba PDL nian liu husi Programa Talk show ne'ebé organiza husi Radio Komunitade Vox Populi Lautem, ne'ebé ko'alia mós kona-ba knaar no funsaun membru assembleia tuir estrutura PDL nian no esprika kona-ba objetivu husi vizita komparativu ne'e ba comunidade iha distritu Lautem.



Membru Assembleia Troka Esperensia iha Distritu Lautem

Alein de ne'e membru assembleia sira mós halo soru-mutu ho membru Assembleia Distritu Lautem hodi buka hatene prosesu no mekanizmu ne'ebé sira uza hodi hala'o PDL. Tanba iha distritu Lautem Aileu, Manatuto no Manufahi maka iha Assembleia iha nivel sub-distritu ne'ebé koñesidu ho naran Assembleia Sub-distritu, maibé distritu seluk hanesan Ainaro, Baucau, Covalima no Manufahi iha deit Assembleia Distritu, iha nivel Sub-distritu so iha Comiçao Dezenvolvimento Sub-Distritu ka CDS. Membru assembleia husi distritu seluk mós hakarak buka hatene no halo kompara vantajen no dezvantajen husi modelu rua ne'e.



Membru Assembleia ba Halo Talk Show iha Radio Komunitade

Governo Lokál Xave ba Dezenvolvimentu



Ministério da
Administração Estatal e
Ord. do Território

Rua Jacinto Candido

Dili, Timor-Leste

Tp: 3317207

E-mail: comunicacao.maeot@gmail.com

Suporta hosi:

Programa Apoio Governasaun Lokál
no



Ministério da Administração Estatal
e Ordenamento do Território

iha website ona!

